

Agama itu Nasihat

Ikhlas: Menurut penjelasan Al-Qur'ān

Perkataan “ikhlas” pada asalnya bermakna kebersihan dan kesucian.

Ikhlas dalam ibadah pula, maksudnya ibadah yang dikerjakan itu hendaklah kerana Allah semata-mata, dengan meninggalkan tingkah laku yang berupa riak. Oleh itu, berkatalah Al-Junaīd

(seorang Sufi yang mashyur):

“Ikhlas itu ialah pembersihan amal perbuatan daripada kekotoran.”

Ikhlas dalam amal perbuatan pula ialah amalan kita itu hendaklah dijalankan dengan sempurna dan rapi, dengan amanah dan pengawasan yang bersungguh-sungguh. Seolah-olah orang yang menjalankan ibadah atau menjalankan sesuatu kerja: melihat Tuhan dalam masa ia melakukannya. Meskipun ia tidak melihat Tuhan tetapi Tuhan tetap melihatnya.

Hal ini dijelaskan oleh al-Qur'ān:

“**Wa huwa ma 'akum ayna mā kuntum**”. (4, *Al-Hadīd*).

“Dan Ia - Allah ‘Azza wa Jalla – ada berserta kamu barang di mana kamu berada.”

Dalam ayat yang lain, dijelaskan lagi:

“**Wa assirū qawlakum awi ajharū bihi, innahu 'adūn bi dhātī al-ṣudūri alā ya'lamu man khalaqa, wa huwa al-laṭīfu al-khabīr.**” (13, 14, *Al-Mulk*).

“Dan rahiakanlah perkataan kamu atau nyatakanlah dia, sesungguhnya ia (Allah ‘Azza wa Jalla) amat mengetahui apa yang terkandung di dalam dada. Tidakkah Ia yang menjadikan itu mengetahui, sedang Dialah yang amat halus, lagi amat luas pengetahuan-Nya.”

Al-Qur'an al-Karim menjelaskan tentang sifat “ikhlas” itu dengan penjelasan yang menunjukkan kebesaran dan keindahannya, dan menunjukkan orang yang berhias dengan sifat ikhlas itu telah mencapai tingkatan kebenaran, dan telah berada dalam martabat yang setinggi-tingginya. Dengan itu peribadinya dihormati dan dimuliakan, kerana zahir dan batinnya sudah mempunyai keadaan yang sama, baik dan mulia belaka. Apabila zahir dan batin seseorang itu telah menjadi suci bersih, meningkatlah ia – setingkat demi setingkat – kemartabat kejayaan dan kebesaran.

Lebih lanjut al-Qur'ān menjelaskan tentang sifat ikhlas itu:

“**Alā Lillahi al-dīnu al-khāliṣ.**” (3, *Al-Zumar*).

“Sesungguhnya agama yang bersih suci itu tertentu bagi Allah.”

Dan firman-Nya lagi:

“**Wa mā umirū illā liya 'budū Allāha mukhlisīna lahu al-dīna ḥunafā', wa yuqīmū al-ṣalāta wa yu'tū al-zakāta, wa dhālikā dīnu**

al-qayyimah.” (5, *Al-Bayyinah*).

“Dan tidak diperintahkan mereka melainkan supaya menyembah Allah dengan menjalankan perintah agama secara ikhlas kepada-Nya, dan cenderung kepada-Nya semata-mata, dan supaya mereka mendirikan sembahyang dan memberi zakat, kerana yang demikian itulah agama yang benar lurus.”

Allah ‘Azza wa Jalla telah memerintahkan Nabi-Nya Muhammad ᷣallā Allāhu 'alayhi wa ālihi wa sallam supaya sifat ikhlas yang sepenuhnya kelihatan jelas pada diri dan tingkah lakunya. Dengan itu akan menjadilah ia contoh yang utama bagi tiap-tiap seorang ahli ibadah yang ikhlas. Firman-Nya:

“**Innā anzalnā ilayka al-kitāba bi al-ḥaqqa fa'budi Allāha mukhlisan lahu al-dīn.** (2, *Al-Zumar*).

“Sesungguhnya Kami telah turunkan kepadamu Kitab (Al-Qur'ān) itu dengan (berisi) kebenaran, maka sembahlah olehmu akan Allah dengan menjalankan ibadah secara ikhlas kepada-Nya.”

Setelah itu Tuhan memerintahkan hamba-hamba-Nya supaya menurut jalan Rasul mereka, dan mengikut pertunjuknya, sehingga mereka benar-benar mengikutinya dan menjadi umatnya.

Perintah Tuhan itu berbunyi:

“**Fad'u Allāha mukhlisīna lahu al-dīna walaw kariha al-kāfirun.**” (14, *Al-Mu'min*)¹.

“Maka serulah Allah dengan beribadah Kepada-Nya secara ikhlas, walaupun dibenci oleh orang-orang Kafir.”

Al-Qur'an al-Karim, menjelaskan perintah-perintah yang menghendaki berlaku

¹ Nama lain bagi surah *al-Ghāfir*.

dan setelah memberi galakan supaya berlaku ikhlas, membentangkan pula beberapa gambaran yang indah tentang perbuatan orang-orang yang ikhlas. Misalnya tentang orang-orang yang berlaku ikhlas dalam membelanjai dan menolong bantu orang lain, yang dilakukan kerana Allah semata-mata, bukan kerana mencari nama atau berkehendakan balasan di dunia.

Mengenai hal ini berkatalah al-Qur'an:

"Wa yuq'imūna al-qa'āma 'alā ḥubbihī miskīnā wa yaṭīmā wa aṣrā. Innāmā nūf'īmukum liwajhi Allāhi lā nurūdu minkum jazā'a wa lā shukūrā." (8,9, Al-Insān).

"Dan mereka beri makan makanan yang digemarinya kepada orang miskin, dan anak yatim, dan orang tawanan. (sambil berkata): "Kami tidak beri makan kepada kamu melainkan kerana Allah. Tiadalah kami menghendaki daripada kamu balasan dan tidak juga terima kasih."

Al-Qur'an menjelaskan lagi tentang orang yang soleh lagi dermawan:

"Wa sayujannabuhā al-atqā al-ladhī yuṭī mālahu yatazakkā. Wa mā liāhadi 'indahu min ni'matin tujzā. Illā abtīghā'a wajhi Rabbīhi al-a'lā." (17-20, Al-Layl).

"Dan akan dijauhkan api neraka itu daripada orang yang taqwa. Yang mendermakan hartanya untuk mensucikannya. Sedang ia tidak menganggung budi seseorang yang patut dibalas. Hanya untuk mencari keredaan Tuhan yang Maha Tinggi."

Suatu gambaran yang lain dibentangkan oleh Al-Qur'an tentang orang-orang dermawan yang ikhlas, yang tidak bermuka-muka atau didesak oleh sesuatu tujuan yang tersembunyi, bahkan mereka

melakukannya kerana keyakinan mereka tentang wajibnya perbuatan itu, dan kerana mereka yakin bahawa Tuhan Yang Maha Mengetahui melihat mereka dan ada bersama-sama mereka. Berkatalah Al-Qur'an:

"Kānū qalīlā mina al-laylī mā yahja'ūn. Wa bi al-ashārihim yastaghfirūn. Wa fī amwālihim haqqu lissālihi wa al-maḥrūm. (17-19, Al-Dhāriyāt).

"Mereka sedikit sekali tidur pada waktu malam. Dan pada waktu akhir malam pula mereka beristighfar (meminta ampun). Dan dalam harta-harta mereka, mereka tentukan hak untuk orang-orang miskin yang meminta dan orang-orang yang kesusahan."

Dan mejelaskan lagi

"Wa al-ladhīna hum li-anānātihim wa 'ādhibihim rā'ūn. Wa al-ladhīna hum 'alā ṣalawātihim yuhāfiẓūn. Ulā'iha humu al-wārithān. Al-ladhīna yarīthūna al-firdawsā hum fīhā khālidūn. (8-11, Al-Mu'minūn).

"Dan (orang-orang mukmin itu ialah) yang menjaga amanah-amanah dan janji-janji mereka dan² yang memelihara sembahyang-sebahyang mereka. Mereka itu ialah yang mewarisi. Yang akan mewarisisnya Syurga Firdaus, mereka akan tinggal kekal di dalamnya."

Dalam segala gambaran yang telah dihidangkan oleh Al-Qur'an tentang sifat orang-orang yang ikhlas, kita dapat asas ikhlas ini mengikat sebab dengan yang menyebabkan: Allah 'Azza wa Jalla, yaitu beriman akan ketuhanan-Nya dan keesaan-Nya serta kadar kuasa-Nya yang meliputi. Apabila iman yang sedemikian ini telah tertanam di dalam hati orang mukmin dan pada akal, perasaan dan

jiwanya, maka iman itu akan menjadi pengawas baginya yang tidak akan lali, dan akan terpancar di dalam hatinya cahaya yang tidak akan padam. Dengan itu ia menempuh jalan yang menempuh jalan yang lurus dan tidak akan terpelengong. Kerana orang sentiasa awas terhadap perintah Tuhan, sudah tentu takut melakukan dosa. Demikian juga barangsiapa telah yakin tentang keesaan Tuhan Yang Maha Besar, yang menjadikan seluruh alam, maka orang itu akan menjadi kuat dan mulia. Ia tidak akan menjadi hina dan tidak menghinakan orang lain. Ia tidak akan terpedaya dan tidak pula akan berlaku khianat.

Selagi kebenaran beriman kepada Allah dan keesaan-Nya menjadi asas sifat ikhlas itu, maka tidaklah pelik jika terdapat di dalam Al-Qur'an satu "sūrah" yang besar erti, yang ringkas tetapi menjadi mukjizat, bernama "Sūrah Al-Ikhlās", mengandungi.

"Qul huwa Allāhu ahad. Allāhu al-ṣamad. Lam yalid wa lam yūlad. Wa lam yakun lahu kufuwā ahad."

"Katakanlah olehmu: Dialah Allah yang menjadi tumpuan sekalian makhluknya. Tiada Ia beranak dan tiada Ia diperanakkan. Dan tiada sesiapa pun sebanding dengan-Nya.

Tidak pelik sesudah penjelasan yang sedemikian ini jika Rasulullah *sallā Allāhu 'alayhi wa ālihi wa sallam* bersabda:

"Man fāraqa al-dunyā 'alā al-ikhlāṣi Lillāhi wa hādahu lā sharīkalahu, wa iqāmi al-ṣalāti wa atī' al-zakāti, fāraqahā wa Allāhu 'anhu rād."

² Berlaku pengulangan perkataan dan.

Barangsiapa bercerai dengan dunia dalam keadaan ikhlas kepada Allah Yang Maha Esa, tiada sekutu bagi-Nya, dan mendirikan sembahyang serta memberikan zakat, maka ia telah bercerai dengan dunia sedang Allah reda akan dia.”

Dan sabdanya lagi:

*“Inna Allāha yuhibba al-abrāra al-atqiyā’ā
al-akhfīyā’ā.”*

“Sungguhnya Allah mengasihi orang-orang yang berkebajikan lagi taqwa dan menyembunyikan amalan mereka.”

Yakni yang mereka beramal dengan bersembunyi, tidak menunjuk-nunjuk dan bermegah, bahkan mereka beramal secara

ikhlas kerana Allah semata-mata.

Ikhlas itu ialah teras amal perbuatan, yang menjadikan berbahaya dan bersinar, yang menjadikan dia mencapai tujuannya dan mengeluarkan hasil.

Mu ‘ādh bin Jabal berkata: “Tatkala aku diutus oleh Rasulullah *ṣallā Allāhu ‘alayhi wa sallam* ke negeri Yaman, berkatalah saya kepadanya: “Ya Rasul Allah, berilah nasihat kepada saya. Rasulullah pun berkata: “Hendaklah kamu berlaku ikhlas untuk agamamu nescaya kerja yang sedikit dapat mencukupimu.”

Yakni hendaklah iman kamu itu ikhlas dan bersih dari hawa nafsu,

dan hendaklah ibadahmu ikhlas kerana Allah semata-mata, akan menjadilah kerja-kerja mu yang sedikit itu banyak faedahnya dan berkat.

Al-Junaid (ketua kaum *sūfiyyah*) pula berkata:

“Di antara hamba-hamba Allah, ada yang faham dan mengerti akan tanggungjawab mereka. Apabila mereka faham: Beramallah mereka. Dan apabila mereka beramal: berlaku ikhlaslah mereka. Mereka pun diruntun oleh ikhlas itu ke pintu kebajikan seluruhnya.”

Ahli-ahli tasawuf, banyak sekali memperkatakan tentang ikhlas itu. Ini menunjukkan tentang ketinggian darjah ikhlas dan nilainya yang besar.



Masjid Negara – di ibu negara Malaysia – dihiasi dengan beraneka jenis lampu warna-warni pada malam menyambut Hari Keputeraan Junjungan Besar Nabi Muhammad (s.a.w) pada 12 Rabi' al-Awwal 1387 yang lalu.

Berkatalah al-Muhsibī (seorang ahli Tasawuf yang terkemuka):

Barangsiapa memperbetulkan batinnya dengan pengawasan dan ikhlas, nescaya Allah ‘Azza wa Jalla memperhiasi zahirnya dengan perjuangan yang bersungguh-sungguh (dalam melawan hawa nafsu) dan menurut perjalanan Nabi.”

Hātim Al-Āsim pula berkata:

“Ikhlas itu dapat dikenal dengan istiqamah (pendirian tetap menurut perintah agama), dn istiqamah itu dengan *rajā'* (harapan), dan harapan itu pula dengan *irādah* (kemahanuan), dan kemahanuan itu pula dengan makrifat.

Ahmad bin ‘Āsim pula berkata:

“Apabila kamu melakukan sesuatu perbuatan yang baik, sedang kamu tidak suka disebut-sebut dan dibesar-besarkan disebabkan ilmu itu dan kamu tiada pula meminta balasan daripada sesiapa pun, maka itu ialah keikhlasan amalmu.”

‘Abdallah Al-Anṣakī pula berkata:

“Keikhlasan amal itu lebih sukar daripada amal sendiri, sedang amal itu pula sukar dilakukan orang.”

Muhammad bin ‘Alī al-Tirmidhī pula berkata: “Kemenangan di Akhirat bukanlah disebabkan banyak amal, tetapi kemenangan di sana disebabkan keikhlasan dalam amal yang dilakukan dengan sebaik-baiknya.”

Khayr Al-Nasāj pula berkata:

Ikhlaslah yang menjadikan amal seseorang itu tidak diterima melainkan dengannya.”

Allah ‘Azza wa Jalla telah berjanji akan membala dengan berganda-ganda akan amal-amal yang baik ada kalanya balasan itu diberikan sepuluh kali ganda, ada kala tujuh puluh kali ganda, ada kalanya tujuh ratus kali ganda, dan ada kalanya lebih daripada itu. Balasan yang berganda-ganda ini ialah disebabkan ikhlas itu mendalam dan teguh, makin besar pula pahala yang menjadi balasannya.

Hal ini telah dijelaskan oleh al-Qur’ān:

“Innā kadhalika najz al-muhsinīn.”
(121, Al-Ṣaffāt).

“Sesungguhnya demikianlah Kami membala orang-orang yang berbuat kebaikan.”

Oleh sebab besarnya kedudukan ikhlas itu, maka Islam kedapatan memerangi lawan ikhlas iaitu “Riak”. Tentang ini berkatalah al-Qur’ān:

“Fawaylu libnūṣalīn. Al-ladhīna hum ‘an salātihim sāḥūn. Al-ladhīna hum yurā’ūn.” (4-6, Al-Mā’ūn).

“Maka celakalah yang didapat oleh orang-orang yang sembahyang. Yang lalu daripada sembahyang mereka. Yang riak.”

Yakni mereka yang mengerjakan sembahyang untuk dipuji orang, bukan kerana Allah.

Bahaya riak juga telah dinyatakan oleh Rasulullah *sallā Allāhu ‘alayhi wa sallam*, sabdanya:

“Al-yasṭru mina al-riyā’i shirk.”

“Riak yang sedikit sekalipun adalah menjadi *shirk* (syirik).”

Harus Rasulullah menyatakan yang demikian, kerana baginda menghendaki supaya perasaan ikhlas dengan sepenuhnya menempati hati orang

Mukmin, sehingga tidak ada tempat lagi bagi lawan ikhlas itu yaitu riak, walau sedikit sekalipun. Kerana riak itu merosakkan amal dan juga merosakkan keadaan orang bersifat dengannya.

Selain daripada itu, ikhlas banyak seginya dan tujuannya dalam kehidupan. Kalau kita melihat ikhlas hamba kepada Tuhannya terletak di kemuncak segala martabat, maka di bawah naungan kemuncak itu, kelihatan berjenis-jenis ikhlas yang lain: umpamanya ikhlas manusia kepada watannya, dengan menumpahkan kasih sayangnya dan membelanya daripada ancaman musuh. Ia sanggup berkorban dengan harta benda dan nyawa untuk mempertahankannya.

Ada lagi sejenis ikhlas yang lain: ikhlas seseorang kepada kaum keluarganya, sahabat-handainya, dan bangsa.

Ada pula sejenis ikhlas lagi: seseorang itu kepada manusia amnya.

Orang yang berakal itu bersungguh-sungguh di dalam pekerjaannya, dan orang yang bodoh itu bergantung pada angan-angannya.

* * *

Saya tidak pernah melihat satu perkara yang banyaknya lebih ringan daripada sedikitnya, melainkan ilmu pengetahuan.
- Abū Nawās.

* * *

Kecantikan manusia itu ialah dari kesempurnaan lidohnya.

* * *

Apabila terlalu banyak pendapat nescaya tersembunyilah kebenaran.